

Buhi nga Tubig

MATERYAL SA SEMINARY ALANG SA BAG-ONG TUGON

Basaha ang mosunod nga mga tudling sa kasulatan ug mga pamahayag, nga mangita og mga ideya mahitungod sa buhi nga tubig nga gitanyag ni Jesukristo.

- Juan 4:13–14
- Juan 7:37–38
- 2 Nephi 9:50–51
- 3 Nephi 20:8–9

Si Elder David A. Bednar sa Korum sa Napulog Duha ka Apostoles mitudlo:



Ang buhi nga tubig nga gipasabot sa [Juan 4:10] usa ka representasyon sa Ginoo nga si Jesukristo ug sa Iyang ebanghelyo. Ug sama nga ang tubig gikinahanglan sa pagpatunhay sa pisikal nga kinabuhi, ang Manluluwas ug ang Iyang mga doktrina, mga baroganan, ug mga ordinansa mahinungdanon para sa kinabuhi dayon. Ikaw ug ako nanginahanglan sa Iyang buhi nga tubig sa kada adlaw ug sa igong suplay aron sa pagpatunhay sa atong nagpadayon nga espirituhanong pagtubo ug paglambo.

Ang mga kasulatan naglakip sa mga pulong ni Kristo ug tinubdan sa buhi nga tubig nga atong magamit ug diin kita makainom og daghan ug dugay. Kamo ug ako kinahanglang motan-aw ug moduol kang Kristo, kinsa mao “ang tuburan sa buhi nga tubig” (1 Nephi 11:25; itandi sa Ether 8:26; 12:28), pinaagi sa pagbasa (tan-awa sa Mosiah 1:5), pagtuon [tan-awa sa Doktrina ug mga Pakigsaad 26:1], pagsiksik (tan-awa sa Juan 5:39; Alma 17:2), ug pagbusog (tan-awa sa 2 Nephi 32:3) sa mga pulong ni Kristo nga anaa sa balaang mga kasulatan. Pinaagi sa pagbuhat niini, madawat nato ang espirituhanong giya

ug proteksiyon sa panahon sa atong mortal nga panaw. (David A. Bednar, “A Reservoir of Living Water” [Church Educational System fireside for young adults, Feb. 4, 2007], 1, broadcasts.ChurchofJesusChrist.org)

Si Elder Joseph B. Wirthlin (1917–2008) sa Korum sa Napulog Duha ka Apostoles mitudlo:



Daghan ang nanglingkod sa lamesang kan-anan sa ebanghelyo ni Jesukristo ug igo lang motilaw sa mga pagkaon nga gisukad alang kanila. Ilang gibuhat ang angay nga buhaton—nagtambong sa ilang mga miting, nagpakli-pakli sa mga kasulatan, nagbalik-balik sa sinati nga mga pag-ampo—apan walay hustong katuyoan. Kon sila matitud-anon, moangkon sila nga mas interesado sa mga pinakabag-ong panghitabo sa ilang kasilinganan, mga kalihokan sa stock market, ug ang plot line sa ilang paboritong salida sa TV kaysa sila maatiman sa mga katingalahang gahom ug sa matam-is nga pagpangalagad sa Espiritu Santo.

Buot ba kamong moambit niining buhing tubig ug mosinati nianang balaang atabay nga nagtubod diha sa sulod ninyo ngadto sa mahangtorong kinabuhi?

Busa ayaw kahadlok. Pagtuo sa tibuok ninyong kasingkasing. Palamboa ang dili matarog nga hugot nga pagtuo sa Anak sa Dios. Himoa nga ang inyong mga kasingkasing mopadangat og hugot nga pag-ampo. Pun-a ang inyong mga hunahuna sa kahibalo mahitungod Kaniya. Isalikway ang inyong mga kahuyang. Paglakaw sa pagkabalaan ug pakig-uyon sa mga sugo. (Joseph B. Wirthlin, “Ang Buhong nga Kinabuhi *Liahona*, Mayo 2006, 100)

Base sa imong nakat-onan gikan sa pagtuon niini nga mga kapanguhaan, sugdi ang paghimo og outline para sa imong pakigpulong. Seguroha nga ang imong outline nagtubag sa mosunod nga mga pangutana. Hunahunaa usab ang mahitungod sa kon unsaon nimo pagpahayag ang imong mga gibati mahitungod kang Jesukristo sa imong pakigpulong. Ikonsiderar ang pagpaambit og personal nga mga kasinatian nga nasinati nimo sa pag-ambit sa buhi nga tubig sa Manluluwas ug sa unsang paagi kadtong mga kasinatian nakaapekto kanimo.

- Unsa ang buhi nga tubig nga gitanyag ni Jesukristo?
- Nganong nanginahanglan man kita sa buhi nga tubig sa Manluluwas?
- Unsa ang atong mahimo aron madawat ang buhi nga tubig gikan sa Manluluwas?
- Sa unsang paagi nga ang pagkahibalo nga gusto sa Manluluwas nga moambit ang tanan sa Iyang buhi nga tubig nakaapekto sa imong gibati mahitungod Kaniya?